

Conseho Consultativo den su relato anual di 2016

Ta expresa su mes di un forma critico riba efectividad di supervision financiero y areglo di conflicto pa paisnan den Reino



CONSEHO Consultativo (Raad van Advies) a publica su relato anual di aña 2016 y diaranson 29 di maart Gobernador Alfonso Boekhoudt a ricibi e prome ehemplar for di man di Presidente mr. Frits Goedgedrag. Manera ta custumber e relato anual no solamente ta duna un bista riba e trabounan, pero tambe ta contene algun comentario critico riba e desaroyonan durante e aña 2016.

Raad no solamente ta expresa su mes critico riba e supervision financiero, pero tambe ta tuma un posicion contra e proposicion di

Hulanda pa no pone e areglo di conflicto pa paisnan den Reino den man di un Huez independiente.

Conseho Consultativo di Aruba (RVA) no ta para su so cu e critica aki: Durante e Caribische Radenoverleg na 2016 a dicidi cu tur tres Consehonan Consultativo di e paisnan di Caribe den Reino lo vocifera e mesun opinion critico aki na nan respectivo Gobierno.

Esaki tambe a tuma lugar na 2016 pa medio di un conseho extenso cu Raad di su propio voluntad a duna na Gobierno.

Pa locual ta trata e supervision financiero Raad ta constata cu e normanan di e Ordenansa Estatal Supervision Financiero Temporal Aruba (Landsverordening Aruba tijdelijk financieel toezicht) no ta efectivo y cu ta haci masha poco pa un finanza publico duradero y sostenible.

Esaki lo mester bira un punto di atencion cu continuacion di e supervision financiero na 2018.

Esaki y hopi mas por lesa den e relato anual, publica na www.rva.aw bou di 'Publicaties'.